

---

■ CUSSEGL GROND

---

# Quitads per l'avegnir dal traffic public

**(anr/fa) 60 deputadas e deputads han sutscrit la dumonda che Gian Michael (pbd, Schons) ha inoltrà al penultim di da la sessiun da zercladur. La regenza vegn dumandada sch'il traffic public en la periferia saja periclità.**

Durant la sessiun d'october 2013 ha tractà il cussegl grond la petiziun «Abunament general Büga per ils giuvenils mo per la mesadad dal pretsch». En quell'ocasiun aveva ditg il president da la regenza *Mario Cavigelli* che la conseguenza d'augmentar la purschida fiss ch'ins stuess cumpensar quai tar autras prestaziuns. El ha menziunà ch'ins pudess spargnar da maniera la pli effizienta tar l'uschenumnà traffic regional. Quel vegn finanzià cumpletmain dal chantun. Igl èn vegnids numnads ils trajects da bus Riein, Panix, St. Antönien, Muntogna

da Schons, Müstair, Samignun ed il bus da notg Surselva. En il rapport tar la segunda consultaziun dal concept dal spazi grischun vegni baingea menziunà ch'il chantun veglia s'engaschar per colliaziuns cun il traffic public segiras tranter ils centers chantunals e regionals sco er cun ils lieus turistics pli gronds. «Displaischavlamain na vegnia però menziunà cun gnanc in pled sche questas colliaziuns vegnian garantidas era per las vischnancas e valladas periferas», ha declerà *Gian Michael*. Perquai dumondan el e 60 ulteriuras deputadas e deputads sch'il traffic regional saja periclità e sch'i saja schizunt da far quint ch'il traffic public en la periferia vegnia dismiss. La regenza vegn a responder la dumonda durant ils proxims mais. Quella dumonda vegn tractada a chaschun da la sessiun d'atun.